



REPUBLIKA E SHQIPËRISË
KUVENDI
Komisioni për Politikën e Jashtme

Dokument parlamentar

RAPORT
PËR
PROJEKTLIGJIN
“PËR RATIFIKIMIN E MARRËVESHJES SË FINANCIMIT, NDËRMJET
KËSHILLIT TË MINISTRAVE TË REPUBLIKËS SË SHQIPËRISË, REPUBLIKËS
SË MALIT TË ZI DHE KOMISIONIT EVROPIAN, PËR PROGRAMIN E
VEPRIMIT TË BASHKËPUNIMIT NDËRKUFITAR IPA II, MAL I ZI - SHQIPËRI,
ALOKIMET PËR VITIN 2017”

Hyrje

Komisioni për Politikën e Jashtme, në cilësinë e Komisionit për dhënie mendimi mori në shqyrtim projektligjin “Për ratifikimin e marrëveshjes së financimit, ndërmjet Këshillit të Ministrave të Republikës së Shqipërisë, Republikës së Malit të Zi dhe Komisionit Evropian, për programin e veprimit të bashkëpunimit ndërkufitar IPA II, Mal i Zi – Shqipëri, Alokimet për vitin 2017”.

Në mbledhjet e Komisionit për të mbrojtur projektligjin dhe për të dhënë shpjegime për pyetjet e anëtarëve të Komisionit ishin të pranishëm përfaqësues të Ministrisë për Evropën dhe Punët e Jashtme.

BAZA KUSHTETUESE E PROJEKTLIGJIT

Projektligji i paraqitur për shqyrtim është propozuar nga Këshilli i Ministrave, sipas përcaktimeve të neneve 78 dhe 83 pika 1 të Kushtetutës së Republikës së Shqipërisë dhe shoqërohet me relacionin përkatës sipas nenit 68 të Rregullores së Kuvendit.

QËLLIMI I PROJEKTLIGJIT

Qëllimi i projektligjit është ratifikimi i marrëveshjes së financimit, ndërmjet Këshillit të Ministrave të Republikës së Shqipërisë, Republikës së Malit të Zi dhe Komisionit Evropian, për programin e veprimit të bashkëpunimit ndërkufitar IPA II, Mal i Zi- Shqipëri, alokimet për vitin 2017.

Programi i bashkëpunimit Mal i Zi - Shqipëri ka për qëllim kryesor të kontribuojë në zhvillimin social-ekonomik të zonave ndërkufitare dhe të rrisë bashkëpunimin ndërmjet dy vendeve nëpërmjet ndërhyrjeve të përbashkëta.

Programi ka reflektuar rëndësinë që BE-ja i kushton çështjeve horizontale dhe ndërsektoriale, çështje këto të reflektuara përmes përzgjedhjes së prioritetëve të tilla si krijimi i partneriteteve ndërkufitare, “autorësia” vendore dhe mundësitë e barabarta, garantimi i mosdiskriminimit të minoriteteve, mbrojtja e mjedisit, të drejtat gjinore etj. Ky ratifikim mundëson zbatimin e projekteve specifike ndërmjet Shqipërisë dhe Malit të Zi, të cilat përveç shkëmbimit të njohurive dhe eksperiencave, do të sjellin rezultate të dukshme në sektorin e mjedisit, turizmit, punësimit etj.

Ky program mbështet gjithashtu në shkëmbimin e eksperiencës dhe të njohurive ndërmjet përfituesve, si dhe në përmirësimin e politikave publike mes autoriteteve kombëtare, rajonale dhe lokale në zonën e programit. Programi në fjalë mbulon një territor prej 11 970 km², me një popullsi prej rreth 749 257 banorë.

Alokimet e vitit 2017 për këtë program financohen nga një grant i Bashkimit Evropian nëpërmjet instrumentit IPA II, me një vlerë prej 1 190 000 eurosh për të dyja vendet, por, duke marrë parasysh edhe bashkëfinancimin kombëtar të të dyja shteteve (210 000 euro bashkërisht), buxheti i përgjithshëm i programit për vitin 2017 arrin vlerën e 1 400 000 eurove.

Sqarojmë se, në total, kontributi që do të japë Bashkimi Evropian për zbatimin e përbashkët të programit Mali i Zi – Shqipëri, për periudhën 2014 - 2020, arrin vlerën e 11 900 000 eurove, por alokimet e mëtejshme do të jenë subjekt i nënshkrimit të marrëveshjeve të tjera financiare ndërmjet vendit tonë, Malit të Zi dhe Komisionit Evropian. Sjellim në vëmendje se, tri marrëveshje të tjera financimi janë konkluduar ndërmjet palëve për të njëjtin program (për alokimet e viteve 2014, 2015 e 2016), të cilat janë ratifikuar edhe nga Kuvendi i Republikës së Shqipërisë (ligji nr.31/2016 dhe ligji nr.78/2018).

Programi do të fokusohet në këto prioritete tematike:

1. Nxitja e turizmit dhe e trashëgimisë kulturore dhe natyrore;
2. Mbrojtja e mjedisit, nxitja e përshtatjes dhe lehtësimit ndaj ndryshimeve klimatike, parandalimi dhe menaxhimi i rrezikut;
3. Nxitja e punësimit, lëvizjes gjeografike të punonjësve dhe përfshirjes sociale e kulturore përtej kufirit.

Përfitues të këtij programi do të jenë zonat si më poshtë:

Në Malin e Zi: Andrijevisa, Berane, Petnjica, Plavë, Gucia, Rozhajë, Podgoricë, Cetinje, Danilovgrad, Budva, Bar dhe Ulqin.

Në Shqipëri: Shkodra, Lezha, Rrethi i Tropojës.

Mali i Zi dhe Shqipëria do të bashkëpunojnë ngushtë me njëri-tjetrin për koordinimin, menaxhimin dhe mbikëqyrjen e zbatimit të programit. Struktura institucionale e programit është e përbërë nga autoriteti kontraktues i programit (Mali i Zi), Komiteti i Përbashkët i Monitorimit, sekretariati i përbashkët teknik, si dhe koordinatorët kombëtarë të fondeve IPA të të dyja vendeve përfituese.

Marrëveshja e financimit për këtë program përbëhet nga 9 pjesë.

ÇËSHTJE TË DISKUTUARA NË KOMISION

Gjatë shqyrtimit të projektligjit në komision deputetët ngritën pyetje mbi shpërndarjen e fondeve dhe diskutuan mbi impaktin e zbatimit të kësaj marrëveshjeje. Pas diskutimeve dhe marrjes së informacionit nga përfaqësuesit e ministrisë përgjegjëse, komisioni vlerësoi rëndësinë e projektligjit në kuadër të nxitjes së bashkëpunimit në mbikëqyrjen dhe zbatimin e programeve.

PËRFUNDIME

Në përfundim të shqyrtimit të këtij projektligji, Komisioni për Politikën e Jashtme pasi vlerësoi se:

- a) Në aspektin ligjor*, projektligji i propozuar është në përputhje me Kushtetutën dhe legjislacionin në fuqi;
- b) Në aspektin procedural*, projektligji është paraqitur në përputhje me Rregulloren e Kuvendit;

dhe pasi e shqyrtoi projektligjin në parim, nen për nen dhe në tërësi, me votat e shumicës së anëtarëve të pranishëm e miratoi atë, dhe u shpreh dakord për kalimin për votim në seancë plenare.

KRYETARE

MIMI KODHELI